

STJÓRNARTÍÐINDI B 56 – 1990

Nr. 357

1016

16. júlí 1990

REGLUR

um smíði og öryggisbúnað báta styttri en 6 m að lengd.

1. *Gildissvið*
 - 1.1 Reglur þessar gilda um báta styttri en 6 m að lengd, mælt milli stafna. Eru bátarnir skilgreindir í reglunum sem smábátar.
 - 1.2 Reglur þessar gilda ekki um smábáta, sem blásnir eru upp með loftkenndu efni eða svokallaða vatnasleða.
 - 1.3 Smábáta má samþykkja sem vinnubáta, enda uppfylli þeir ákvæði reglna þar um.
2. *Almenn ákvæði*
 - 2.1 Smábátar, sem framleiddir eru til sölu hér á landi, skulu samþykktir af Siglingamálastofnun ríkisins, og skráðir hjá skipaskráningardeild stofnunarinnar. Sama gildir um innflutta smábáta til notkunar hér á landi.
 - 2.2 Smábátar, sem eigandi smíðar til eigin nota, geta hlotið samþykki hjá Siglingamálastofnun ríkisins, sé þess óskað, og skulu þeir þá einnig skráðir hjá skipaskráningardeild stofnunarinnar.
 - 2.3 Smábáta er óheimilt að nota í atvinnuskyni, nema þeir séu samþykktir af Siglingamálastofnun ríkisins sem vinnubátar til viðkomandi starfsemi og hafi gilt skoðunarvottorð því til staðfestingar.
3. *Samþykki smábáta.*
 - 3.1 Smábátar skulu samþykktir af Siglingamálastofnun ríkisins samkvæmt reglum um smíði og búnað báta með mestu lengd minni en 15 metrar.
 - 3.2 Bátar, sem smíðaðir eru í alþjóðlega keppnisflokkum eru undanþegnir ákvæðum reglna um smíði skemmtibáta, að undanskildum kröfum um flotholt, enda séu bátarnir eingöngu notaðir á takmörkuðu svæði til æfinga eða keppni.
4. *Skráning smábáta.*
 - 4.1 Í skrá yfir smábáta skulu koma fram eftirfarandi upplýsingar:
 - 4.1.1 Smábátanúmer, sem er skráningarnúmer bátsins.
 - 4.1.2 Nafn og heimilisfang framleiðanda.
 - 4.1.3 Smíðanúmer og smíðaár.
 - 4.1.4 Aðalmál (lengd, breidd, dýpt)
 - 4.1.5 Gerð aðalvélar og vélarafli í kW.
 - 4.2 Í skrá yfir smábáta sem samþykktir eru sem fiskibátar, skal eftirfarandi koma fram auk þess sem tilgreint er í 4.1:
 - 4.2.1 Nafn bátsins.

- 4.2.2 Umdæmisbókstafir og tölur.
 - 4.2.3 Fullt nafn og heimilisfang eiganda.
 - 4.2.4 Skrásetningardagur og ár.
 - 4.2.5 Brúttótonn.
 - 4.3 Heimilt er að strika út af smábátaskrá þá fiskibáta sem ekki eru skoðaðir samkvæmt ákvæðum í gr. 9.2 í þrjú ár samfleytt. Við endurskráningu bátanna skal fara að sem við nýskráningu, þ.e. gengið skal úr skugga um að bátarnir uppfylli að öllu leyti ákvæði reglna.
5. *Merking smábáta.*
- 5.1 Smábátar, sem samþykktir eru af Siglingamálastofnun ríkisins, skulu merktir með viðurkenningarskilti frá stofnuninni, sem varanlega er fest í bátinn samkvæmt ákvörðun Siglingamálastofnunar ríkisins.
 - 5.2 Á viðurkenningarskiltinu skal eftirfarandi tilgreint:
 - 5.2.1 Smábátanúmer.
 - 5.2.2 Hámarksvélarafl í kW.
 - 5.2.3 Hámarkshleðsla í kg.
 - 5.2.4 Hámarksfjöldi manna, sem báturinn er viðurkenndur fyrir.
 - 5.3 Einnig skulu bátarnir merktir með smíðanúmeri eða öðru númeri, sem Siglingamálastofnunin tekur gilt. Þetta númer skal varanlega fest eða grópað í bol smábátsins samkvæmt ákvörðun Siglingamálastofnunar.
 - 5.4 Smábátar sem samþykktir eru sem fiskibátar skulu auk þess sem að framan greinir vera merktir sem hér segir:
 - 5.4.1 Skráningarnúmeri á heppilegum stað á báðum hliðum.
 - 5.4.2 Nafni bátsins.
 - 5.4.3 Umdæmisbókstöfum og tölum.
 - 5.4.4 Bókstafir og tölur skulu vera dökkir stafir á ljósum grunni eða ljósir stafir á dökkum grunni og hæð stafanna ekki minni en 10 cm.
 - 5.4.5 Stafirnir skulu gefa endurskin í myrkri.
6. *Samþykkt eldri smábáta.*
- 6.1 Eigendur eldri smábáta geta óskað eftir samþykki Siglingamálastofnunar ríkisins á þeim. Uppfylli þeir ákvæði reglna eftir því sem við á, er heimilt að skrá bátanna og skulu þeir þá merktir samkvæmt 5. gr.
7. *Smábátar, sem leigðir eru gegn greiðslu.*
- 7.1 Smábátar, sem leigðir eru gegn greiðslu, skulu hafa hlotið viðurkenningu Siglingamálastofnunar ríkisins samkvæmt þessum reglum.
8. *Öryggisbúnaður.*
- 8.1 Vinnubátar skulu búnir eftirgreindum öryggisbúnaði:
 - 8.1.1 Bjargbelti fyrir alla um borð.
 - 8.1.2 Þrjú rauð handblys.
 - 8.1.3 Vatnshelt vasaljós.
 - 8.1.4 Sjúkrakassi.

- 8.1.5 Þokulúður.
- 8.1.6 Árar eða fullnægjandi talstöð.
- 8.1.7 Austurtrog.
- 8.1.8 Radarspegill, sem festa má á ár.
- 8.1.9 Legufæri og handslökkvitæki skv. reglum um smíði og búnað báta með mesta lengd minni en 15 m.
- 8.2 Siglingamálastofnun ríkisins kveður nánar á um öryggisbúnað vinnubáta með hliðsjón af farsviði þeirra, svo og ef bátarnir hafa leyfi til sjósóknar utan þess tíma sem tilgreindur er í gr. 9.2. Skal þá tekið mið af reglum um björgunar og öryggisbúnað báta lengri en 6 metrar.
- 8.3 Smábátar, sem eingöngu eru notaðir sem vatnabátar á takmörkuðu svæði, skulu búnir bjargbeltum fyrir alla um borð, árum og austurtrogi.
- 8.4 Smábátar í eigu félagasamtaka eða siglingaklúbba, sem lánaðir eru eða leigðir til félagsmanna undir eftirliti, skulu búnir sem vatnabátar samkvæmt gr. 8.3.
- 8.5 Smábátar, sem leigðir eru út til almennings til stuttra ferða á lygnu vatni í sjónmáli frá eftirlitsstöð leigusala, skulu vera búnir bjargbeltum fyrir alla um borð, árum og austurtrogi.
- 8.6 Allur laus búnaður skal vera í lokuðum hirslum eða umbúðum, sem eru fasttengdar í bátnum.
9. *Skoðun smábáta.*
- 9.1 Smábátar sem notaðir eru í atvinnuskyni, skulu skoðaðir eigi sjaldnar en einu sinni á ári og skal þeim veitt skoðunarvottorð uppfylli þeir ákvæði reglna.
- 9.2 Skoðunarvottorð skal aðeins gilda á tímabilinu 1. apríl til 30. september. Smábátar sem á að nota á takmörkuðu svæði í fjörðum eða flóum, eða við fiskveiðar eða fiskeldi nálægt ströndum landsins, geta þó fengið sérstakt leyfi til sjósóknar með takmarkað farsvið utan þess tímabils sem að framan greinir.
- 9.3 Siglingamálastofnun ríkisins er heimilt að gera skyndiskoðanir á smábátum þeim, sem þessar reglur fjalla um, hvar og hvenær sem hentugt þykir. Sé smábáti á einhvern hátt áfátt í gerð eða búnaði, ber skoðunarmanni að benda eiganda á slíka galla og hvernig megi úr þeim bæta.
- Skoðunarvottorð vinnubáta má fella úr gildi, ef í ljós kemur að þeir uppfylla ekki ákvæði reglna við skyndiskoðun.
- Reglur þessar, sem eru settar samkvæmt 3. mgr. 1. gr. laga um eftirlit með skipum, nr. 51 frá 30. mars 1987, staðfestast hér með til að öðlast þegar gildi og birtast til eftirbreytni öllum þeim, sem hlut eiga að máli. Jafnframt falla úr gildi reglur nr. 51/1979, sbr. nr. 49/1983 um sama efni.

Samgönguráðuneytið, 16. júlí 1990.

Steingrímur J. Sigfússon.

Ragnhildur Hjaltadóttir.